

**BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
MINISTARSTVO PRAVOSUĐA I UPRAVE UNSKO-SANSKOG KANTONA**

**ZAKON O IZMJENAMA I DOPUNAMA ZAKONA O DRŽAVNOJ SLUŽBI U
UNSKO-SANSKOM KANTONU**

Septembar 2019.godine

- **Nacrt**

Na osnovu člana 1., 2. e), 3. e), a u vezi sa članom 4. Poglavlja IV i člana 11. b) odjeljak A poglavlje V Ustava Unsko-sanskog kantona-prečišćeni tekst („Službeni glasnik Unsko-sanskog kantona“, broj 1/04 i 11/04), na prijedlog Vlade Unsko-sanskog kantona Skupština Unsko-sanskog kantona, na _____ sjednici održanoj dana __. __. 2019. godine, donosi:

ZAKON
o izmjenama i dopunama Zakona o državnoj službi u Unsko-sanskom kantonu

Član 1.

U Zakonu o državnoj službi u Unsko-sanskom kantonu („Službeni glasnik Unsko-sanskog kantona“, broj: 14/17), član 25. mijenja se i glasi:

„Član 25.

(1) Državni službenik dužan je da po nalogu rukovodioca ili neposredno nadređenog, radi zamjene državnog službenika koji je na odsustvu iz državne službe u skladu sa članom 27. stav (1) tačka c) Zakona do povratka odsutnog državnog službenika na radno mjesto, pored poslova iz opisa svog radnog mjesta, obavlja poslove osnovne djelatnosti iz nadležnosti organa državne službe koji nisu u opisu poslova radnog mjesta na koje je postavljen, a za koje ispunjava sve potrebne uvjete.

(2) Državnom službeniku pripada pravo na naknadu za obavljanje poslova iz stava (1) ovog člana u visini do 20% od osnovne plaće radnog mjesta čije poslove privremeno obavlja“.

Član 2.

U Članu 27. stav (1) tačka c), iza riječi „Hercegovini“ interpunkcijski znak „zarez“ se briše i dodaju se riječi: „ili bude imenovan na mjesto direktora u pravnom licu sa javnim ovlaštenjima na teritoriji Bosne i Hercegovine, javnoj ustanovi, javnom preduzeću ili drugoj instituciji čiji je osnivač bilo koji nivo vlasti u Bosni i Hercegovini, te u privrednom društvu u kojem Bosna i Hercegovina, Federacija Bosne i Hercegovine, kanton, grad ili općina učestvuje sa više od 50% ukupnog kapitala“.

U članu 27. stav (2) iza riječi „Hercegovini“ interpunkcijski znak „tačka“ se briše i dodaju se riječi: „odnosno kad bude razriješen dužnosti direktora u pravnom licu sa javnim ovlaštenjima, javnoj ustanovi, javnom preduzeću ili drugoj instituciji čiji je osnivač bilo koji nivo vlasti u Bosni i Hercegovini, te u privrednom društvu u kojem Bosna i Hercegovina, Federacija Bosne i Hercegovine, kanton, grad ili općina učestvuje sa više od 50% ukupnog kapitala“.

Član 3.

U članu 31. iza stava (2) dodaje se novi stav (3) koji glasi:

„(3) Žalba na rješenje iz stava (2) ovog člana ne odlaže izvršenje rješenja“.

Član 4.

U Članu 32. stav (1) mijenja se i glasi:

„(1) Organ državne službe može na osnovu pisanog sporazuma sa drugim organom državne službe svih nivoa vlasti u Federaciji Bosne i Hercegovine i uz saglasnost ili na pisani zahtjev državnog službenika preuzeti državnog službenika na niže, isto ili slično radno mjesto, a kod rukovodećih državnih službenika može preuzimati samo državne službenike iz člana 11. stav (1) tačka a) podtačke 4), 5) i 6) ovog Zakona. Preuzimanje se vrši pisanim sporazumom organa državne službe od čega se primjerak sporazuma i rješenje o postavljenju dostavljaju Agenciji“.

Član 5.

Poslije člana 33. dodaje se novi član 33a., koji glasi:

„33a.

(Interno oglašavanje)

(1) Ako se upražnjeno radno mjesto ne može popuniti sa Liste prekobrojnih, Agencija objavljuje interni oglas na službenoj web stranici Agencije.

(2) Pravo prijave na interni oglas imaju državni službenici iz organa državne službe svih nivoa vlasti u Federaciji Bosne i Hercegovine, koji ispunjavaju uvjete za obavljanje poslova tog radnog mjesta

(3) Interni oglas ostaje otvoren osam dana od dana objavljivanja.

(4) Interni oglas se provodi na način i po postupku koji je propisan za provođenje javnog konkursa, s tim što se u okviru internog oglasa ne provodi ispit općeg znanja“.

Član 6.

U članu 34. stav (1) mijenja se i glasi:

„(1) Ukoliko se upražnjeno radno mjesto u organu državne službe ne popuni internim oglasom, na zahtjev rukovodioca organa državne službe, Agencija provodi proceduru popune putem javnog konkursa koji se provodi prema odredbama ovog člana i članova 35. do 40. ovog Zakona“.

Član 7.

U članu 40. u stavu (5) iza tačke d) briše se interpunkcijski znak „tačka“ stavlja se „zarez“ i dodaje nova tačka e) koja glasi:“e) pouku da žalba ne odlaže izvršenje rješenja“.

U članu 40. dodaje se novi stav (8) koji glasi:

„(8) Žalba izjavljena protiv rješenja o postavljenju državnog službenika, kao i žalba izjavljena protiv obavještenja Agencije u toku konkursne procedure, ne odlaže izvršenje rješenja odnosno obavještenja“.

Član 8.

U članu 42. stav (1) mijenja se i glasi:“(1) S izuzetkom radnih mjesta iz člana 11. stav 1) podtačka 1), 2), i 3) ovog Zakona rukovodilac organa državne službe može zbog hitnih i neodložnih poslova, duže privremene spriječenosti za rad, porodiljnog odsustva državnog službenika, izvršiti prijem državnog službenika na određeno vrijeme do godinu dana bez

javnog konkursa uz obavezu da organ državne službe o tome obavijesti Agenciju i da istovremeno pokrene postupak javnog konkursa”.

Član 9.

U članu 44. iza stava (3) dodaje se stav (4) koji glasi:

„(4) Odredbe stava (1), (2) i (3) ovog člana ne odnose se na državne službenike primljene u organ državne službe na određeno vrijeme”.

Dosadašnji stav (4) postaje stav (5).

Član 10.

U članu 45. iza stava (2) dodaje se novi stav (3) koji glasi:

„(3) Raspored državnog službenika u nižu kategoriju moguće je izvršiti i na njegov lični zahtjev”.

Dosadašnji stavovi (3) i (4) postaju stavovi (4) i (5).

Član 11.

U članu 47. stav (5) mijenja se i glasi:

„(5) Odredbe stava (1) ovog člana ne odnose se na prijem volontera-lica za stručno osposobljavanje bez zasnivanja radnog odnosa, koja se u skladu sa planom prijema primaju na stručno osposobljavanje u organ državne službe bez javnog konkursa”.

Vrijeme stručnog osposobljavanja iz stava 1. ovog člana računa se u pripravnički staž i radno iskustvo utvrđeno kao uvjet za rad u određenom zanimanju i može trajati najduže onoliko vremena koliko traje pripravnički staž.

Ugovor o stručnom osposobljavanju se zaključuje u pismenoj formi gdje je organ državne službe dužan kopiju ugovora dostaviti u roku osam dana nadležnoj službi za zapošljavanje.

Volonter-lice na stručnom osposobljavanju ima pravo na zdravstveno osiguranje kako je to utvrđeno propisima za nezaposlena lica, a prava po osnovu osiguranja za slučaj povrede na radu i profesionalnog oboljenja osigurava organ državne službe u skladu sa propisima o penzijskom i invalidskom osiguranju”.

Član 12.

Član 50. mijenja se i glasi:

„Član 50.

(Plaćeno i neplaćeno odsustvo i rad sa skraćenim radnim vremenom)

Vlada Kantona u skladu sa kolektivnim ugovorom utvrđuje bliže uvjete u skladu s kojim državni službenik može uzeti plaćeno i neplaćeno odsustvo i kada se može dužnost državnog službenika obavljati sa skraćenim radnim vremenom”.

Član 13.

U članu 52. stav (1) tačka b) mijenja se i glasi:

„b) kada navršši 65 godina života i najmanje 15 godina staža osiguranja, odnosno navršši 40 godina staža osiguranja bez obzira na godine života”.

U članu 52. stav (1) tačka j) mijenja se i glasi:
„j) danom izricanja pravomoćne presude kojom je državnom službeniku izrečena kazna zatvora u trajanju od tri mjeseca ili duža kazna.“.

U članu 52. stav (1) dodaje se nova tačka p) i glasi:
„p) u slučajevima neopravdanog izostanka s posla u kontinuitetu dužem od pet radnih dana.“.

Član 14.

U članu 53. stav (2) iza tačke „j)“ briše se „i“ stavlja zarez i iza tačke „lj)“ briše se interpunkcijski znak „tačka“ stavlja „zarez“ dodaje tačka „m)“ i tačka „p).“

Član 15.

U članu 56. stav (2) dodaje se nova tačka i) koja glasi:
„i) neopravdan izostanak s posla jedan dan.“.

U članu 56. stav (3) tačka h) mijenja se i glasi:
„h) neopravdan izostanak s posla uzastopno dva dana.“.

U članu 56. stav (3) u tački „p)“ briše se interpunkcijski znak „tačka“ stavlja zarez i dodaje nova tačka r) koja glasi:
„r) ne dostavi dokaz poslodavcu o privremenoj spriječenosti za rad ili produženju privremene spriječenosti za rad, najkasnije u roku od sedam dana od dana nastupanja privremene spriječenosti za rad“.

Član 16.

U članu 60. dodaje se stav (2) koji glasi:
„(2) Vlada Kantona Uredbom o osnivanju Disciplinske komisije propisuje broj članova i zamjenika članova Disciplinske komisije, posebne uvjete koje moraju ispunjavati članovi Disciplinske komisije, način i postupak njihovog imenovanja, pravo na naknadu za rad u Disciplinskoj komisiji, kao i druga pitanja bitna za status i rad Disciplinske komisije“.

Dosadašnji stavovi (2) do (6) postaju stavovi (3) do (7).

Član 17.

Poslije člana 72. dodaje se novi član 72a. i 72b., koji glasi:

„Član 72a.

(Popuna upražnjenog radnog mjesta putem internog oglašavanja)

(1) Ukoliko popuna upražnjenog radnog mjesta namještenika nije izvršena na način utvrđen u članu 70. i 71. ovog Zakona, popuna upražnjenog radnog mjesta namještenika u organu državne službe vrši se putem internog oglasa.

(2) Interni oglas se objavljuje na oglasnoj tabli i web stranici organa državne službe, ili na drugi pogodan način koji osigurava da se zainteresirani kandidati upoznaju sa oglasom.

(3) Pravo prijave na interni oglas imaju namještenici iz svih organa državne službe svih nivoa vlasti u Federaciji Bosne i Hercegovine, koji ispunjavaju uvjete za obavljanje poslova tog radnog mjesta. Oglas ostaje otvoren najmanje osam dana od dana objavljivanja.

(4) Interni oglas sadrži:

- a) naziv radnog mjesta i opis poslova upražnjenog radnog mjesta.
- b) posebne uvjete utvrđene za obavljanje poslova tog radnog mjesta.
- c) spisak dokumenata koje treba podnijeti uz prijavu na oglas.
- d) rok trajanja oglasa.
- e) adresu za podnošenje prijave na oglas”.

„Član 72b.

(Komisija za provođenje internog oglasa)

(1) Rukovodilac organa državne službe za svaki interni oglas rješenjem imenuje komisiju za provođenje internog oglasa. Komisija se sastoji od tri člana od kojih su dva iz organa državne službe u koji se prima namještenik, od čega je jedan predstavnik sindikata i jedan predstavnik Agencije za državnu službu.

(2) Komisija iz stava (1) ovog člana razmatra sve prijave podnesene na interni oglas i utvrđuje listu kandidata koji ispunjavaju sve uvjete oglasa i listu kandidata koji ne ispunjavaju sve uvjete internog oglasa o čemu se sastavlja zapisnik. Lista se utvrđuje prema svim činjenicama koje su tražene internim oglasom.

(3) Rukovodilac organa državne službe odlučuje o prijemu namještenika u radni odnos sa Liste kandidata koji ispunjavaju sve uvjete internog oglasa o čemu donosi pismeno rješenje. Kandidatima koji nisu primljeni u radni odnos dostavlja se pismeno obavještenje o rezultatima internog oglasa.

(4) Protiv obavještenja iz stava (3) ovog člana može se u roku od osam dana izjaviti žalba Odboru za žalbe. Žalba ne odlaže izvršenje rješenja”.

Član 18.

Član 73. mijenja se i glasi:

„Ako se upražnjeno radno mjesto namještenika ne popuni na način utvrđen u članu 70., 71. i 72a. ovog Zakona radno mjesto se popunjava putem javnog oglasa koji objavljuje organ državne službe na službenoj internet stranici tog organa”.

Član 19.

U članu 74. stav (4) mijenja se i glasi:

„(4) Protiv obavještenja iz stava (3) ovog člana može se u roku od osam dana izjaviti žalba Odboru za žalbe. Žalba ne odlaže izvršenje rješenja”.

Član 20.

U članu 77. u stavu (2) iza tačke f) briše se interpunkcijski znak „tačka” stavlja se „zarez” i dodaje nova tačka g) koja glasi:”g) pouku da žalba ne odlaže izvršenje rješenja”.

U članu 77. stav (3) briše se.

Dosadašnji stavovi (4) i (5) postaju stavovi (3) i (4).

Član 21.

U članu 94. dodaje se novi stav (2) koji glasi:

„(2) Novčanom kaznom u iznosu od 200.00 KM do 800.00 KM kaznit će se za prekršaj državni službenik koji:

- a) postupi suprotno odredbi član 24. stav (3) tačka a).
- b) postupi suprotno odredbi član 27. stav (1) tačka a), c), d), e) i f)“.

Član 22.

(Donošenje propisa i općih akata)

(1) Nadležni organi koji su ovim Zakonom ovlašteni za donošenje podzakonskih propisa, dužni su te propise donijeti u roku od 60 dana od dana stupanja na snagu ovog Zakona.

(2) Rukovodioci organa državne službe dužni su u roku od 30 dana od dana donošenja propisa iz stava (2) ovog člana donijeti pravilnike o unutrašnjoj organizaciji usklađene sa odredbama ovog Zakona.

Član 23.

Ovaj zakon stupa na snagu osmog dana od dana objavljivanja u „Službenom glasniku Unsko-sanskog kantona“.

Broj:
Dana:

Predsjedavajući Skupštine
Unsko-sanskog kantona

Agan Bunić

OBRAZLOŽENJE
ZAKONA I IZMJENAMA I DOPUNAMA ZAKONA O DRŽAVNOJ SLUŽBI U
UNSKO-SANSKOM KANTONU

I – PRAVNI OSNOV

Ustavni osnov za donošenje Zakona i izmjenama i dopunama Zakona o državnoj službi u Unsko-sanskom kantonu sadržan je u odredbama člana 1., 2. c) i 3. e), a u vezi sa članom 4. Poglavlja IV i članom 11. b) Ustava Unsko-sanskog kantona, kojim je propisano da Kanton ima sva ovlaštenja koja nisu Ustavom Federacije izričito povjerena federalnoj vlasti, zatim u kojem je propisano da je Kanton ovlašten za utvrđivanje politike, koja se tiče reguliranja i osiguranja javnih službi i socijalne politike, kao i u odredbama člana 4. Poglavlja IV Ustava kantona, kojima je propisano da su Kanton i federalna vlast, u skladu sa Ustavom ovlašteni za socijalnu politiku, a da ovlaštenja Kantona i federalne vlasti iz člana 3. (socijalne politika), mogu biti ostvarivana zajednički ili odvojeno. U odredbi člana 11 b) Ustava Kantona, propisana je zakonodavna nadležnost Skupštine kantona.

II – RAZLOZI ZA DONOŠENJE

Skupština Unsko-sanskog kantona, na sjednici održanoj dana 21.07.2017.godine donijela novi Zakon o državnoj službi u Unsko-sanskom kantonu, koji je objavljen u „Službenom glasniku Unsko-sanskog kantona“ broj: 14/17, kojim je sistem državne službe u Unsko-sanskom kantonu, u osnovi, približila sistemu državne službe u Federaciji Bosne i Hercegovine. Nešto kasnije, donesen je i Zakon o dopunama Zakona o državnoj službi u Unsko-sanskom kantonu („Službeni glasnik Unsko-sanskog kantona“ broj: 16/17), za koji je Ustavni sud Federacije Bosne i Hercegovine, presudom broj U-58/17 utvrdio da je u suprotnosti sa Ustavom Federacije Bosne i Hercegovine. Postupajući po toj presudi Ustavnog suda Federacije Bosne i Hercegovine, Skupština Unsko-sanskog kantona na sjednici održanoj dana 12.07.2019.godine, donijela je Zakon o prestanku važenja Zakona o dopunama Zakona o državnoj službi Unsko-sanskog kantona („Službeni glasnik Unsko-sanskog kantona“ broj: 18/19).

Kako bi se obezbijedilo valjano praćenje primjene novih normativnih i institucionalnih rješenja u oblasti radno-pravnih odnosa državnih službenika i namještenika, Programom rada Ministarstva pravosuđa i uprave planirana je priprema Izvještaja o stanju u organima državne službe. Izvještaj je pripremljen na osnovu podataka dostavljenih ovom Ministarstvu od strane kantonalnih, gradskih i općinskih organa državne službe. Cilj izvještaja je ukazati na provođenje Zakona o državnoj službi u Unsko-sanskom kantonu u kantonalnim, gradskim i općinskim organima državne službe, dati ocjenu postojećeg stanja te predložiti konkretne mjere za unapređenje primjene tog Zakona.

Dosadašnja praksa u primjeni Zakona o državnoj službi i podzakonskih propisa donesenih na osnovu ovog Zakona, ukazala je i na određene probleme sa kojima su se organi državne službe suočili. Prema podacima prikupljenim od kantonalnih, gradskih i općinskih organa državne službe, ocjena dosadašnje implementacije Zakona i podzakonskih propisa ukazuje na određene prepreke za efikasno i brzo rješavanje problematike koju tretira ovaj zakon, a koja je trenutno regulisana na način koji dovodi ili do odugovlačenja postupaka ili

do nemogućnosti adekvatnog rješavanja nastalih problema, na šta je posebno ukazao kolegij gradonačelnika i načelnika Unsko-sanskog kantona u svojoj inicijativi za izmjenu Zakona o državnoj službi.

Iz navedenih razloga pristupilo se iznalaženju pravnih rješenja koja imaju za cilj što kvalitetniju i efikasniju implementaciju postojećeg Zakona o državnoj službi.

Također, prije upućivanja ranijeg nacrt zakona na razmatranje Vladi Unsko-sanskog kantona, od Agencije za državnu službu FBiH, Saveza općina i gradova u Federaciji BiH, SIGME- Direkcije za Evropske integracije Bosne i Hercegovine, Samostalnog sindikata državnih službenika i namještenika u organima državne službe, sudskoj vlasti i javnim ustanovama, Sindikalne organizacije kantonalnih organa vlasti, službi i tijela uprave Bihać primjedbe, u cilju što kvalitetnijeg zakonskog rješenja zatraženi su prijedlozi i sugestije na važeći Zakon o državnoj službi u Unsko-sanskom kantonu. Prije sačinjavanja ovog nacrt Zakona analizirane su primjedbe i sugestije dostavljene od strane Agencije za državnu službu FBiH, Sindikalnih organizacija kantonalnih i općinskih organa vlasti, te organa uprave i sudske vlasti gdje je ovo Ministarstvo prihvatljive primjedbe ugradilo u ovaj nacrt Zakona.

III – OBRAZLOŽENJE PRAVNIH RJEŠENJA

Članom 1. član 25. stav (1) detaljnije je razrađen institut dužnosti zamjene odsutnog državnog službenika. Naime, ranije odredba je bila neodređena tako da riječi „u izuzetnim i hitnim slučajevima“ stvara širok obim slučajeva za primjenu navedene odredbe dok se na način kako je to predloženo izmjenama preciznije i konkretnije propisuje kada se navedena zakonske odredba može primjeniti. Također, kada je u pitanja naknada državnom službeniku na koju ima pravo za obavljanje poslova iz opisa drugog radnog mjesta je regulisana na način da ista iznosi 20% u odnosu na ranije rješenje kada je ista iznosila 30% i koja se nije isplaćivala zbog neusaglašenosti Zakona o plaćama i naknadama u organima vlasti Unsko-sanskog kantona sa Zakonom o državnoj službi.

Članom 2. član 27. stav (1) tačka c) i stav 2) je dopunjen na način da se pravo na odsustvovanje iz organa državne službe u odnosu na ranije rješenje proširuje i za slučaj kada državni službenik bude imenovan na mjesto direktora u pravnom licu sa javnim ovlaštenjima na teritoriji Bosne i Hercegovine, javnoj ustanovi, javnom preduzeću ili drugoj instituciji čiji je osnivač bilo koji nivo vlasti u Bosni i Hercegovini, te u privrednom društvu u kojem Bosna i Hercegovina, Federacija Bosne i Hercegovine, kanton, grad ili općina učestvuje sa više od 50% ukupnog kapitala.

Članom 3. član 31. se dopunjuje stavom (3) kojim je propisano da žalba na ovo rješenje ne odlaže njegovo izvršenje. Ovakvo rješenje je predloženo iz razloga što se po dosadašnjoj praksi pokazalo da se žalbe ne rješavaju po nekoliko mjeseci, a premješteni državni službenik zbog suspenzivnog dejstva žalbe ne bi mogao preuzeti poslove drugog radnog mjesta, što bi se u konačnici izgubio smisao internog premještaja.

Članom 4. član 32. stav (1) mijenja se na način da se u odnosu na ranije rješenje mogućnost sporazumnog preuzimanja državnog službenika omogući odnosno proširi i na niže radno mjesto u odnosu na radno mjesto sa kojeg se preuzima.

Članom 5. dodaje se novi član 33a. kojim se propisuje novi institut internog oglašavanja. Razlog za uvođenje ovog instituta jeste u tome da se osiguraju jedinstvene procedure i kriteriji za prijem u državnu službu u Unsko-sanskom kantonu sa sistemom državne službe u Bosni i Hercegovini, te Federaciji Bosne i Hercegovine.

Članom 6. član 34. stav (1) je izmjenjen u odnosu na primjenu novog instituta internog oglašavanja.

Članom 7. član 40. novim stavom (5) i (8) propisuje se da žalba na odlaže izvršenje rješenja, jer su ranija rješenja dovodila do onemogućavanja da kandidat preuzme dužnost duži vremenski period zbog žalbi koje se rješavaju jednu do dvije godine. Slično pravno rješenje sadržano je i u Zakonu o državnoj službi u institucijama BiH.

Članom 8. član 42. stav 1) se mijenja tako da se ovim pravnim rješenjem može efikasnije riješiti problem popune upražnjenih radnih mjesta u slučajevima dužih bolovanja i porodiljnog odustva državnih službenika.

Članom 9. u članu 44. dodaje se novi stav (4) kojim se propisuje da se odredbe o unapređenju ne odnose na državne službenike primljene o organ državne službe na određeno vrijeme.

Članom 10. član 45. stav (3) propisano je da se raspored državnog službenika u nižu kategoriju može izvršiti i na njegov lični zahtjev.

Članom 11. član 47. stav (5) je izmjenjen tako da se pojednostavljuje procedura prijema volontera u organe državne službe u odnosu na prijem pripravnika čija procedura traje duže zbog mogućnosti izjavljivanja žalbe u postupku prijema, što dovodi do nemogućnosti prijema lica na stručno osposobljavanje u vremenu kada za tim stvarno postoji potreba.

Članom 12. član 50. se mijenja na način da Vlada Kantona posebnim propisom utvrdi bliže uvjete kada su u pitanju plaćena i neplaćena odsustva državnih službenika, te rada sa skraćenim radnim vremenom.

Članom 13. član 52. stav (1) usklađuje se, odnosno harmonizira sa odredbama novog Zakona o radu FBiH. Također, tačka j) se mijenja kako bi se preciziralo kada se ima utvrditi prestanak radnog odnosa licu koje je osuđeno na kaznu zatvora u trajanju od tri mjeseca ili duža kazna. Novom tačkom p) propisan je novi slučaj prestanka radnog odnosa zbog neopravdanog izostanka sa posla u kontinuitetu dužem od pet radnih dana.

Članom 14. član 53. stav (2) je dopunjen tako što se propisuju i drugi slučajevi prestanka radnog odnosa u kojima žalba ne odlaže izvršenje rješenja.

Članom 15. član 56. stav (2) je izmjenjen na način da je dodana nova tačka i) kojom se proširuju slučajevi lake povrede službene dužnosti. U stavu (3) tačka h) je izmjenjena i jasnije precizirana u odnosu na ranije rješenje, dok je tačkom r) proširen novi slučaj teže povrede službenih dužnosti.

Članom 16. član 60. stav (2) je izmjenjen tako što isti ima za cilj da se omogući dalji rad Disciplinske komisije uzimajući u obzir da je član 2. Zakon o dopunama Zakona o državnoj službi Unsko-sanskog kantona presudom Utsvanog suda Federacije BiH proglašen neustavnim.

Članom 17. dodaje se novi član 72a, kojim se propisuje novi institut internog oglašavanja. Razlog za uvođenje ovog instituta jeste u tome da se osiguraju jedinstvene procedure i kriteriji za prijem u državnu službu u Unsko-sanskom kantonu sa sistemom državne službe u Bosni i Hercegovini, te Federaciji Bosne i Hercegovine. Također, članom 72b. propisuje se postupak imenovanja komisije za provođenje internog oglasa, njen sastav i način rada.

Članom 18. član 73. je izmjenjen u odnosu na primjenu novog instituta internog oglašavanja.

Članom 19. članom 74. stav (4) propisuje se da žalba ne odlaže izvršenje rješenja, jer su ranija rješenja dovodila do onemogućavanja da kandidat preuzme dužnost duži vremenski period zbog žalbi koje se rješavaju jednu do dvije godine.

Članom 20. član 77. stav (2) se dopunjuje tačkom g) kojom se propisuje da žalba ne odlaže izvršenje rješenja, jer su ranija rješenja dovodila do onemogućavanja da kandidat preuzme dužnost duži vremenski period zbog žalbi koje se rješavaju jednu do dvije godine.

Članom 21. član 94. se dopunjava novim stavom (2) kojim se propisuju kaznene odredbe za državne službenike ako postupe suprotno članu 24. stav 2. tačka a) i članu 27. stav 1. tačka a), c), d), e) i f) ovog Zakona.

IV – FINANSIJSKA SREDSTVA

Za provođenje ovog zakona nije potrebno obezbijediti dodatna sredstva u Budžetu Unsko-sanskog kantona.

V – PRELAZNE I ZAVRŠNE ODREDBE

U Članu 22. nacrtu Zakona utvrđen je rok za donošenje podzakonskih propisa za provođenje ovog zakona i pravilnika o unutrašnjoj organizaciji.



MINISTAR

Sim Dizdarević, dipl.pravnik



Na osnovu člana 96., a u vezi sa članom 116. Poslovnika Skupštine Unsko-sanskog kantona („Službeni glasnik Unsko-sanskog kantona“ broj: 9/17) na osmoj redovnoj sjednici održanoj dana 23.10.2019.godine, Skupština Unsko-sanskog kantona donosi

ZAKLJUČAK

Član 1.

Prihvata se Nacrt Zakona o izmjenama i dopunama Zakona o državnoj službi Unsko-sanskog kantona.

Član 2.

Zadužuje se Ministarstvo pravosuđa i uprave da u roku od 30 (trideset) dana organizira i provede javnu raspravu o Nacrt Zakona o izmjenama i dopunama Zakona o državnoj službi Unsko-sanskog kantona.

Član 3.

Ovaj Zaključak stupa na snagu danom donošenja i objavit će se u „Službenom glasniku Unsko-sanskog kantona“.

Broj: 01-02-4-139/19
23.10.2019.godine
Bihac

